

四庫全書

經部

欽定四庫全書

經部  
春秋辯義卷首七

詳校官監察御史<sub>臣</sub>沈孫璉

給事中<sub>臣</sub>溫常綬覆勘

總校官進士<sub>臣</sub>繆琪

校對官中書<sub>臣</sub>田尹衡

謄錄監生<sub>臣</sub>張鈞

欽定四庫全書

春秋辨義卷首七

明 卓爾康 撰

書義四

諸歸

周官凡諸侯之獄訟以邦典定之諸侯無相執之道晉雖盟主苟所執之君罪不當廢宜無不得歸者趙子常曰晉文績齊桓之業以太義匡中國將解宋圍而曹衛固于從楚門于曹曹人不服故入曹執曹伯以畀宋人假道于衛

衛人弗許既而楚師敗衛侯懼出奔楚使元咺奉叔武以  
受盟晉復衛侯以踐土之盟也衛侯入而前驅殺叔武是  
不賴斯盟矣故溫之會執衛侯歸之于京師則二君挾荆  
楚叛中國其罪已著而衛侯廢伯主之命殺其弟之攝君  
受盟者抑又甚焉晉侯皆不能正以王法廢而黜之更立  
賢君以示教戒于天下乃以巫史之言釋曹伯又取貨以  
歸衛侯其戰功雖雋而大義不明故二君者皆書歸以見  
其罪宜廢而伯主以私釋之也春秋之世篡奪者無所顧

忌雖齊晉盛時猶不能討曹負芻殺其太子而自立諸侯請討之晉厲公會諸侯于戚執曹伯歸于京師使厲公能請于天子討負芻篡逆之罪誅之以謝諸侯而立子臧以君曹則大義信矣乃列于會而後執之又歸之京師而後釋之故書其歸見厲公以釋有罪累京師也至于歸入之義諸家紛紛左氏曰凡去其國逆而立之曰入復其位曰復歸諸侯納之曰歸以惡曰入孔氏曰釋例曰凡去其國者通謂君臣及公子母弟也國逆而立之本無位則稱入

本有位則稱復歸齊小白入于齊無位也衛侯鄭復歸于  
衛復其位也諸侯納之有位無位皆曰歸衛孫林父蔡  
季是也身為戎首則曰復入晉欒盈是也公羊氏曰曷  
為或言復歸者出惡歸無惡復入者出無惡入有惡入  
者出入惡歸者出入無惡穀梁氏曰歸易辭也范氏曰  
傳例曰歸為善自其歸次之此傳曰歸易辭也則歸有  
二義善者謂之歸易者亦謂之歸也大夫出奔反以好  
曰歸以惡曰入胡氏曰春秋書歸有二義一易辭一順

辭也其書入亦有二義一難辭一逆辭也王樵氏曰書歸者八鄭突曹赤皆奪正衛侯鄭殺叔武見討伯主出入皆無善狀蔡廬陳吳邾益皆見復于滅亡之餘趙鞅叛而反國公孟彊蒯賾之黨叛蒯賾而從輒自某歸于某者六蔡季陳黃宋華元為善辭衛孫林父楚公子比為惡辭曹伯負芻為幸詞書復歸者五來歸者一鄭世子忽無譏衛侯鄭衛侯衎二人一律也有譏衛元咺惡之也曹伯襄閔之也又陋之也季子宜之也書入者十

二李廉曰諸侯入國例七許叔宜復國而不得其道故書字書入齊小白陽生莒去疾可以有國而無君父之命故雖以國氏不書公子而書入鄭突衛朔失正亂倫已失國而又求入春秋以其逆也故書爵書名書入獨衛獻入夷儀春秋俟其改過也故書爵書人而不名胡氏于許叔小白去疾皆曰難辭則陽生衛獻亦可入此例子衛朔曰逆辭則鄭突亦可入此例公羊注以為許叔本小國春秋前失爵在字例入者出入皆惡明當誅



是蓋不知入許之本末而妄為此說也左氏歸入例亦多不合又曰春秋書納者七皆不當納也糾不書公子與捷菑同公之伐戰與晉之弗克納同糾捷菑以庶孽書納蒯賸以世子亦書納蒯賸無親之大罪也蒯賸得書世子而糾捷菑不書公子者書世子以著靈公之失也楚之納潁子與公孫寧儀行父齊之納北燕伯皆內弗受之辭也郟鼎同此義此皆前人歸入之大例然按之亦多不通左氏曰諸侯逆而立之曰入孔氏曰本無

位則稱入鄭突衛朔不有位乎復其位曰復歸衛元咺  
之位又何足援乎公羊曰復歸者出惡歸無惡王樵氏  
曰公羊以鄭忽之復歸為復鄭則其出也正以祭仲受  
脇而廢正立不正耳出何惡乎以突為奪正則出入皆  
惡又安得以言歸為善乎蓋緣誤以祭仲為知權故以  
突之書歸為順祭仲是突本有惡聖人特欲順祭仲行  
權而從無惡之書也有是理乎復入者出無惡入有惡  
則樂盈之出為無惡乎入者出入惡則小白出以逃難

入以有奉安見其惡乎歸者出入無惡則趙鞅歸晉其  
出也以叛可謂無惡乎穀梁曰歸易辭也鄭突入櫟囊  
身潛出不亦難乎以胡氏之例言之諸入固有難者逆  
者許叔流離在外國人望之久矣乘便入國可謂之難  
且逆乎諸歸固有易者順者鄭突曹赤皆奪正可謂易  
且順乎至復入之例諸家皆以為大惡蓋因復入之人  
而目呼之耳彭城宋地魚石入之欒盈晉人還入晉地  
故書曰復蓋其成叛繇于復入而非復入足為叛也予

故為之說曰直至其所曰入明徵其返曰歸失位以出  
曰復歸驀還舊地曰復入有奉而來曰自因人而入曰  
納此六言者夫人往來措辭之常無所褒貶也其褒貶  
者存其本事而善惡自見耳獨還復之說陸氏最安其  
曰公羊云還善詞也比復為善也穀梁云還者事未畢  
復者事畢文正倒也當為還者事畢復者事未畢師還  
公還自晉歸父還自晉士匄聞齊侯卒乃還皆不當更  
還又並合禮故曰還事畢也善辭也公如晉至河乃復

公孫敖如京師不至而復仲遂至黃乃復皆事未畢而復也

戎狄

西周之季王綱解而戎益東戎狄相繼為中州患幾與春秋相終始向非齊晉二伯天下不為左衽者幾希夫子所為嘆微管也戎自隱二年與魯會盟已不安蠻夷而有壇坫之想矣莊二十年齊人伐之至二十四年侵曹入其國逐其君勢大猖獗山戎為其種類三十年齊

人伐之所以披其黨也特書山戎必非前戎也二十六年公伐戎三十一年齊侯來獻戎捷蓋春秋予齊桓攘夷狄匡天下之特筆焉左氏懵不曉事漫以諸侯不相遺俘常理斷之此時二伯未起天下尚不知尊周安能責其獻王即使獻王不告于魯魯安從書之觀宣公十六年晉使趙同獻狄俘于周此最當書亦以不告不書可見矣且春秋固魯史也夫子借魯表一王之法繫天下之事深幸其有此一獻以著尊攘之業何不可也莊

公二十六年書公伐戎而三十一年即書齊侯來獻戎  
捷則三四年間犄角齊桓以成戎捷且見我魯助伯之  
力亦不淺焉得此一捷而戎患以銷至僖公十年齊桓  
公同許男伐北戎蓋殄滅遺類固無大害矣三十二年  
之姜戎文公八年之雒戎宣公三年陸渾之戎成公元  
年之茅戎不過數條而襄公四年傳載晉悼公用魏絳  
和戎五利之策使盟諸戎修民事田以時十一年公謂  
魏絳曰子教寡人和諸戎以正中華八年之中九合諸

侯以金石之樂賜之至昭十六十七年而戎蠻子為楚誘殺陸渾之戎竟為晉滅哀公四年晉且執戎蠻子赤歸于楚矣此春秋治戎之始終也而為春秋之患者狄尤熾蓋自齊獻戎捷之後次年狄伐邢而狄始見經入邢入衛伐晉滅溫侵鄭何啻戎之侵曹齊桓攘卻似于戎有餘而于狄不足然能使邢遷如歸衛國忘亡一二親暱不至為蓼六忽諸者則齊桓二救之功亦安可泯哉至僖公十八年齊桓公卒五公子亂狄敢于救齊竟



作干戈之衛二十年且與齊盟儼行壇坫之禮自此以後伐鄭侵齊逼衛遷帝丘而狄之橫益不可制矣晉文末受伯命在位七年攘楚不暇其迫衛帝丘之遷政在文公卒之前年雖卒後一年晉人敗狄于箕非文公身親事然固不可謂非遺筭餘靈也不然狄之為中國害四十年矣使有一矢著狄蓋春秋何以不書乎後十三年而文公十一年我魯有叔孫得臣敗鹹之事叔孫獲狄僑如以命宣伯而左傳于鄭瞞四子詳其始末穀梁

侈其佚宕亦非小弱矣傳言長狄而經單言狄則長狄即前狄可知不然亦狄中佼佼可為全狄之勢者也夫子書此全以攘狄之功與魯蓋得臣敗狄後止于十三年書狄侵衛一條而此後宣公三年四年書赤狄八年書白狄則狄勢分矣其狄勢所以分者得臣一敗之工不可誣也得臣敗狄之後而即書赤狄白狄者則夫子以攘狄之功與魯益不誣也狄散而赤狄盛八年晉師白狄伐秦傳載晉及狄平十一年晉侯會狄于攢函蓋

交白狄以制赤狄也于是赤狄果孤而宣公十五年十  
六年赤狄遂有路氏甲氏之滅春秋攘狄之功至此觀  
厥成焉當是時晉侯獻俘天子桓子千室士會黻冕二  
三子列孤卿受釀賞天下無復有赤狄之患矣至成公  
三年晉之伐廡咎如則赤狄之別種也赤狄既滅晉亦  
無賴于白狄遇待必衰白狄亦知晉之給我也于是成  
公九年同秦人伐晉而晉遂敗之十二年晉人敗狄于  
交剛昭公元年晉荀吳帥師敗狄于大鹵傳言無終羣

狄而白狄亦衰自此狄竟不見于經是晉之治戎用和  
治狄用戰其法異也其白狄別種為鮮虞遂成一國晉  
臥榻之側安能容此耶假道鮮虞以伐肥滅肥而昭公  
十三年遂有鮮虞之伐自是十五年定四年五年哀六  
年伐鮮虞者又四見于經鮮虞終不可滅而更別號中  
山爭雄戰國晉且先鮮虞亡矣此春秋治狄之始終也  
春秋一書義莫大於尊攘而所攘者有三戎也狄也楚  
也隱桓以後戎嘗為諸侯患至莊公而其勢稍衰狄繼

為患于邢衛諸國齊桓晉文前後治之迨宣成後而狄  
勢亦弱惟楚終春秋之世為時最久然彼哉一語夫子  
固未嘗頌言誅之左傳于尊攘大義漫不知省後儒如  
陸趙諸人亦第隨人口吻曰夫子作春秋如何尊周室  
如何攘夸狄其實於聖人真實匡濟俱不能一一拈出  
而但于伐鮮虞則曰啟疆伐潞子則曰殘幼於大義奚  
當哉

世變

齊桓初主盟則在莊十六年同盟于幽也五霸桓公之盛則僖九年之會于葵丘也晉不復主盟而齊復主諸侯則昭二十六年景公之盟于鄆陵也晉始見經則僖二年虞師晉師滅下陽也楚始見經則莊十年荆敗蔡師于莘也楚陵中國則莊十六年之荆伐鄭也荆與魯交則莊二十三年荆人來聘也荆之易而為楚則僖元年楚人伐鄭也楚始與夏盟則僖十九年會陳蔡楚鄭盟于齊也楚大夫始見經則僖之二十一年楚人使宜

申來獻捷也楚君臣始見于經則文九年楚子使椒  
來聘也初予楚以伯則宣十一年楚以陳侯鄭伯盟于  
辰陵也楚大夫有氏族則成二年公會楚公子嬰齊于  
蜀也楚與中國準亦自成二年蜀之盟十二國首楚人  
也晉楚同主夏盟則襄二十七年豹及八國之大夫盟  
于宋也諸侯旅見于楚則襄公二十八年之公如楚也  
楚專合大夫則昭四年之十二國會于申也楚此後  
復稱人則昭十七年之楚人及吳戰于長岸也秦始皇見

經則僖十五年晉侯及秦伯戰于韓也秦君臣始見經則文十二年秦伯使術來聘也秦此後不與晉交兵則襄十四年晉荀偃十三國之見伐也越始見經則昭五年會楚人伐吳也吳始見經則成七年吳入州來也吳與諸侯盟則襄五年晉宋列國會于戚也自隱以來齊伐魯皆書人耳其君將書君則文十五年齊侯侵我西鄙也大夫將書大夫則襄十七年齊高厚帥師伐我北鄙也自成二之袁婁以來齊世從晉而始叛之則在襄



二十三年齊侯伐衛遂伐晉也鄭之叛晉則定七年齊侯鄭伯盟鹹也衛之叛晉亦自定七年齊侯衛侯盟于沙也魯亦叛晉則定公十年及齊平也自襄二十三年叔孫豹帥師救晉後晉楚之救不書者六十年至哀七年而書鄭駟弘救曹哀十年而書吳救陳中國無伯而諸侯自相救也諸侯自相救猶可言也以吳救陳不可言也以大夫會諸侯則文元年公孫敖會晉侯于戚也以大夫盟諸侯則文二年公孫敖會宋公陳侯鄭伯晉

士穀盟于垂隴也是故書士穀而後凡役書大夫大夫專將則文三年晉陽處父帥師伐楚以救江也是故書處父而後凡將書大夫必貶而後人之自宣公而後征伐益在大夫故自宣公十八年公伐杞後凡伐皆不書公衛書大夫帥師則成二年衛孫良夫帥師及齊戰于新築也使舉上客舊法也文十八年書公子遂叔孫得臣如齊而大夫並使無使介矣將稱元帥舊法也自成二年書季孫行父臧孫許叔孫僑如公孫嬰齊帥師而

四卿並將無將佐矣大夫自為會則成十五年叔孫僑如會吳于鍾離也雖以句吳故不屑與會然而會自大夫專矣大夫自為盟則在襄三年叔孫豹及諸侯之大夫及袁僑盟也雖以袁僑故不與同盟而盟自大夫益專矣君咸在會大夫竟自盟雖盟非尊者之事令大夫盟亦無不可而君權倒置太阿下執至此而君臣之體不可復問矣蓋襄十四年春正月會于向十有四國之大夫也夏四月會伐秦七國之大夫也冬會于戚七國

之大夫也三會皆國之大事而大夫皆專之豈晉悼將終倦勤不振乎則晉平初立安得不有溴梁之事耶大夫叛君則襄二十六年衛孫林父入于戚以叛也魯自伐杞後不書公者八十年不狃侯犯陽虎等起而政不在大夫復書公則宣六年公侵鄭也夫大夫專盟既自文二年與士穀盟于垂隴始則桓十一年之柔會宋公盟于折者何大夫專將既自文三年陽處父帥師以救江始則隱十年之翬帥師會齊人鄭人伐宋者何豈非

我魯已為之兆乎而乃獨責于晉也然所惡于專盟專  
將者蓋以大夫為之主耳若桓十一之盟于折宋公為  
主而柔從之隱十年之伐宋齊為主而翬從之非柔之  
自為盟而翬之自為伐也且在我魯不可書魯人辭不  
得不書柔書翬也王臣于諸侯會不必殊而盟殊盟于  
小臣不必殊而大臣殊莊公十四年單伯會齊侯宋公  
衛侯鄭伯于鄆此會不必殊也僖八年洮之盟王人與  
盟此盟于小臣不必殊也僖九年葵丘之會宰周公不

與盟此大臣殊也齊桓尊周立法必無僭越之事此三者會盟王臣之定例至襄公二年單子與晉宋列國盟于鷄澤昭十三年劉子與晉齊列國同盟于平丘則王大臣爭相執耳矣春秋之初王綱猶振桓五年蔡人衛人從王伐鄭猶有體也至莊六年而王人子突救衛諸侯不惟無相從者而反助衛朔以與天子抗至于齊桓為伯首在尊周莊十四年與陳曹伐宋請師于周書曰單伯會伐宋立言有法王室亦甚威重焉至成公十六

年公會尹子晉侯齊國佐邾人伐鄭十七年公會單子  
晉侯伐鄭則天朝卿佐亦與執戈矣是皆世變使然  
也

名稱一

陸氏曰古者一字不成文辭皆以氏字配之姜氏子氏  
以氏配姓也季氏臧氏以氏配族也哭于賜氏以氏配  
名也仲氏吹篪又不念伯氏之言以氏配字也滅赤狄  
潞氏以氏配國也母氏聖善以氏配親也然則通而言

之皆得言氏別而言之單言氏者皆謂族也姓則百代  
不易又公子之子例以謚配氏僖伯文伯宣叔襄仲之  
類而後代子孫因以其字為氏示所出不亂所謂別子  
為祖也其餘則或以官或以邑為其氏族以自分別凡  
此皆如近代之論房也又曰男子皆以氏配名華元士  
燮高固之類不言其姓婦人乃稱姓姬姜之類禮曰男  
子稱名婦人稱姓是也公子公孫以子孫為氏明與君  
一體以異于衆臣也不以國為氏者異于君也曾孫以



下去君稍踈則可書其氏矣又曰子生三月父命之名  
二十而冠敬其名而立其字五十乃為大夫則又敬其  
字而呼伯仲凡稱其字必加子字于上子美稱也且以  
便于言也子突子哀是也宋孔父以子是其姓不可言  
子孔故曰孔父父美稱也加之者亦以便于言也古者  
亦有名父者如孫林父胥甲父之類而無以子字名者  
以子者配其字之美稱故避之父則本非配字之言故  
可為名

名稱二

凡王世子不名王子稱字必見殺若相殺而後稱名佞夫以見殺名子朝以爭立名非是不名也天子三公稱公曾為三公而有土為畿內諸侯者亦曰公皆以其地配公字言之周公祭公是也天子卿大夫有封為畿內諸侯者皆曰子殷制已然箕子微子是也周因之故王臣稱子者皆畿內諸侯也劉子單子是也凡王朝大夫未爵稱字南季仍叔是也傳稱內史叔服內史于周禮

為中大夫吳氏曰王朝中下大夫四命無封邑者以字  
配氏上士中士稱名宰嚭是也下士稱人王子在喪未  
葬之稱與諸侯同昭二十二年書王子猛卒雖既葬而  
未及葬節是也然則居皇入王城王下皆當稱子稱名  
今但稱名不稱子與下文異者見其當立與子朝別特  
去子字夫子之深意也蘇子繇曰猛既稱王猛矣于其  
卒也稱王子猛何也春秋書名嚴于卒葬于其卒不得  
不正其本名也所謂非薨非葬名有所不必盡也諸侯

惟宋稱公餘稱侯伯子男四等各隨本爵書之唯葬時稱公見其非王謚也吳楚僭王生書本爵葬則不書傳所謂避其號也凡諸侯內生稱公葬稱我君外生稱爵卒稱爵稱名葬則舉謚稱公必見弒然後稱其君苟闇弒殺則不稱其君凡嗣子未葬稱名既葬稱子會諸侯稱子以師行稱爵出外稱子惟施于盟會行師稱爵也出奔稱名即在喪亦稱名也君戕國滅見執以歸稱世子凡諸侯不生名去國辯二君名見納不名復國繼絕

名小國之君來朝詳之名附庸之君名大者稱字凡諸侯朝會降爵成禮錄其實諸侯世子來奔逆以諸侯之禮書爵邨伯來奔是也諸侯之弟攝位受盟稱子衛叔武是也附庸世子攝君來朝稱人邾牟葛是也凡畿內諸侯卒不稱爵葬則舉謚稱公同諸侯如葬劉文公是也凡公子公孫為卿書屬公子益師公子買是也非卿稱名州吁無知是也攝卿稱名無駭翬之類荀林父曰攝卿以往可也隱不爵命大夫用攝禮也此三例者不

必然也繼故名之衛晉是也爭國名之篡立未會諸侯  
名之殺之雖非卿稱公子諸殺公子不言大夫是也在  
位見殺書其大夫君臣之辭書屬與氏同也外殺若放  
不言大夫其君薨未葬稱子既葬稱爵以葬為斷不以  
日月請更詳之如僖公七年冬葬曹昭公而八年春洮  
之盟稱曹伯僖公九年宋桓公未葬而夏葵丘之會稱  
宋子可見其不合例者有二桓公十二年十一月衛宣  
公卒未葬而十三年二月之戰稱衛侯說者曰墨纒臨

戎武事欲威故以爵命也會盟則否僖公二十五年衛  
文公已葬而冬十一月洮之盟猶稱衛子豈葬期未遠  
衛子尚未以爵行耶衛宣雖未葬已踰年衛文雖葬未  
踰年蓋又以踰年為重也成公十八年春晉弑其君州  
蒲夏公至自晉晉侯使士臼來聘不稱子者蓋晉弑厲  
公時即葬之于翼東門之外以車一乘葬不成禮國人  
不以君父禮之耳

名稱三

凡諸侯之子公子曰公子公孫曰公孫公孫之子賜族稱氏公孫為兄後卒稱族凡大夫為卿二命三命皆稱氏名舊說大夫三命書氏二命書名一命書人按傳言叔孫昭子三命踰父兄則叔孫豹二命豹二命書氏則云二命書名非矣小國之卿二命然非接我不書苟接我雖非卿亦名則云一命書人者亦非矣吳楚皆子爵而其臣書氏名與中國公侯之大夫等當時書法豈皆據周禮命數為準左氏所言卿大夫之等與周合公穀



但據經文言之書名世為大夫書人通謂之微者未賜族稱名挾柔溺之類啖氏謂不請命不書族非也東遷諸侯猶不請命况大夫乎命于天子稱字孔父女叔祭仲單伯是也家語曰孔父生時所賜號女叔來聘穀梁傳其名天子之命大夫也外卿以事來不見公不名仲孫高子不使禮見公禮無所屬也主盟會非卿稱氏名成二年晉司空非卿傳稱司空亞旅皆受一命之服知非卿也內大夫非卿但志其事外大夫非卿稱人如

宋人盟宿鄭人序邾人下者皆其下大夫也小國之卿稱人必見殺若討而後書其大夫已絕見討不言其大夫欒盈良霄之類盜殺不言其大夫非見殺而書大夫者衆辭大夫既卒不名原仲夷伯是也文公十四年公孫敖卒于外不書大夫位絕也凡諸侯子弟稱公子以氏者有二種曾受王命為卿者以公子為氏公子慶父之類是也此外則被殺者非卿亦書公子重骨肉也故不言大夫而直謂公子陳人殺公子禦寇是也其不稱

公子而以國帶名謂之國氏亦有二種其君自命為卿稱國以氏莒慶之類是也其篡弑及為國人所立則雖非君命之卿亦以國氏齊無知衛晉鄭突曹赤之類是也公羊所謂國氏者是也然各國之公子不稱其國何以別之國氏之說亦未然也魯宋齊晉衛蔡陳鄭八國之卿自齊桓伯後無不稱族餘國則否公穀言曹莒無大夫者無命大夫也舊說謂無君命若無君命何以得為大夫乎禮諸侯之卿皆命于天子平王東遷諸侯之

卿無復請命故隱桓及莊之初少有書族者及齊桓既  
霸列會頗多凡列班位未命者在已命者下故此諸國  
皆得請賜族其不得者小國不能自通者而已終春秋  
秦雖大國少列會盟故亦不請命楚既僭王固當不請  
及公子嬰齊入會中國春秋書之同于列國命卿豈其  
能請命于周假此以與諸國爭長乎抑自為之乎未可  
斷也自嬰齊之後楚卿亦書族矣已命者則通于諸國  
故書族書名未命者但曰某人言但某國之人耳同于

衆大夫及庶士也如此者所以重王命尊周室也大國之卿不過三人時多僭越其數頗多皆非禮也魯卿雖未命者書其名詳內事也無駭翬溺是也他國非命卿不書既無王命不通于他國也來魯及事連魯者皆書其名詳內事也紀履緌鄭宛莒挈楚宜申莒慶秦術吳札之類是也

名稱四

春秋自文公以前禮樂征伐自諸侯出以大夫見者多

人之文公以後政在大夫無不書名矣故書人之時稱名必有異義當求其所以名書名之時書人必有異義當求其所以人視其所以而春秋之時義思過半矣夫文公以前大夫皆人矣而隱二之無駭隱四之翬桓十一之柔莊二之慶父莊三之溺僖元僖三之友僖十五之公孫敖僖二十三之公子遂魯無不名者春秋詳內事所以異外也且我魯之史不可稱魯人彼以事適他國各有本末不得不書名也若閔元之齊仲孫閱二之

齊高子以省難來魯不勝存亡骨肉之感國人望之如  
父母焉烏得不詳其名氏乎楚以夷自處至成公二年  
公子嬰齊盟蜀始以名氏入春秋而僖四年即有楚屈  
完來盟之目何也大其義者著其事著其事不得不著  
其人完安得不書其不言使者不欲遽進而書楚子也  
僖二十五年之莒慶二十六年之衛甯速皆以名見何  
也莒以元年鄆之役與魯有怨衛公平莒于魯昨年衛  
君而莒臣此年莒君而衛臣君臣屢盟不可不記其實

也且列國稱人多是征伐若會盟無慮皆君矣即臣亦紀其名以徵會也然而不可謂非政在大夫之漸也君會而稱人如莊五以納朔會則齊侯宋公稱人十三以宋御說立方兩月會則御說稱人畧之皆有故也若征伐大夫固多稱人矣即以君將亦有稱人者如莊二十八之伐衛齊侯以事遠畧稱人僖三十之圍鄭晉侯從秦伯畧稱人三十三之敗秦晉侯以方墨畧稱人是也至若莊十四之伐宋與單伯會十六之伐鄭二十八之



救鄭為爭鄭制楚之始宜無所畧何以稱人乎僖三十三年晉人敗狄于箕之傳曰八月晉侯敗狄于箕卻缺獲白狄子明是卻缺行師而晉侯不過督率之耳齊桓公自莊十六年滅遂至僖元年救邢始稱齊師以前多書人豈齊桓盡以微者主兵哉熊氏曰苟非身係其君親之即身在行間亦不必目君也郝仲輿曰凡君臣民皆稱人文成襄以前書法自是如此此于稱人之時求其所以名之義也若文公以後書法不得不變矣文元

年衛孔達伐晉書人杜氏以為孔達為政不共盟主與兵伐鄭受討喪邑故貶稱人是也二年垂隴之會晉以大夫盟諸侯而士穀遂與宋陳鄭三君揖讓于壇坫之上于是即波臣戎客如楚椒秦術且儼然以名通上國矣故自書士穀而後凡役皆書名氏若不書大夫名氏而書人者必有故也是年晉人伐秦取汪及彭衙報復無已殘民結怨是亦不可以已乎春秋畧而人之即至次年秦伯濟河焚舟封穀尸伯西戎左氏艷稱之而書

法亦僅曰秦人伐晉而已三年伐沈而晉宋五國稱人必微者沈即自潰不必將尊師衆可知晉秦無志中國蟻鬪無已春秋惜之故七年令狐之役兩皆稱人至十年北徵之取且以國舉書秦伐晉忽畧甚矣說者曰狄之非也至十二年河曲書秦人宣二年伐晉書秦師八年同白狄伐秦十五年伐晉書秦人或人或師或國詳畧異辭非有異義于其間也且楚淪于夷秦僻于遠苟非實以事至易于稱人不甚計也文九年公子遂會晉

宋衛許救鄭不及楚師左傳卿不書緩以懲不恪是也  
十七年晉衛陳鄭伐宋為孫林父孔達石楚矣即陳公  
孫寧非上卿亦卿也而稱人何耶杜氏曰昭公雖以無  
道見弑而文公猶以弑君見討故林父伐宋以失所稱  
人晉侯平宋以無功不序明君雖不君臣不可以不臣  
所以督大教宋魯皆弑晉受賂而還故文十七年伐宋  
稱人也文公十四年鄭激而從楚晉貪而醜正皆春秋  
所不忍言也故宣元年鄭同楚侵陳稱人晉同宋伐鄭

稱師晉畏楚而還失伯者之義故二年即趙盾在行亦稱人將卑師少而稱人則十年之晉宋衛曹伐鄭也食言而稱人則十二年晉宋衛曹清丘之盟也畏晉而竊與楚盟為匱盟稱人抑或從一事再見之例稱人則成二年十一月蜀之盟也兼有齊非卿故下列楚師與中國準蔡侯許男乘楚車失位不書三義以微而稱人則成九年鄭人圍許也勝大取罪稱人不以勝告稱人則襄公八年鄭子國子耳侵蔡也尊晉侯而齊宋衛不書

大夫者則五月晉悼公會于邢丘也以十四年會向伐秦會戚凡三條人名不同多少亦異曹莒邾滕薛杞小邾七小國不論君卿大夫書人其常也前二條齊人經俱不書名宋人則前二條書人後一條書宋華閱衛則會向稱人伐秦稱北宮括稱人必微者稱名自卿在行也然公孫薑北宮括二子稱名蓋以其身為社稷特名以顯之又有別義昭二十三年晉人圍郊者為籍談荀躒書晉人何也去年十月荀籍雖已勤王為子朝所敗

十二月晉又以賈辛司馬督閏月又以箕遺樂徵右行  
詭濟師後五人皆微者故總稱晉人耳哀公十年宋人  
伐鄭無傳昭公以後兩次伐吳皆書楚人當時以夷攻  
夷無所優劣也林堯叟曰昭公十七年楚人及吳戰于  
長岸楚復稱人矣意楚衰且從吳同稱乎趙子常曰楚  
大夫將稱人者七蓋有微旨子重帥師書于經者詳矣  
侵宋避晉侯而還故畧之橐師囊瓦陽丐未嘗為中國  
寇患故有事蠻夷但書人圍蔡伐陳傳不言其人自昭

而後唯楚君大夫將奪其恒稱治在夷狄也其娶齊伐莒入鄆一事再見稱人乃史例

爵次

趙子常曰凡周班諸侯序爵爵均尚德據定四祝佗告萇弘益指始封之君而言也王人序諸侯上僖八王人僖九宰周公是也何氏曰王人銜王命會諸侯諸侯當北面受之故尊序于上也寰內諸侯之師序列國上僖二虞師晉師是也大夫如其班隱五伐宋鄭人序邾人



下僖二十八會溫秦人序邾人下皆以大夫序卿下也  
莊十五伐鄆十六伐鄭二十六伐徐僖二十一鹿上二  
十九翟泉皆宋人序齊人上時齊卿猶不先宋也莊十  
九年伐我西鄙二十八救鄭僖五侵陳皆齊人序宋人  
上時宋非卿也文十七伐宋陳人序衛人下傳曰衛孔  
達陳公孫寧杜氏曰寧位非上卿也成二蜀之盟齊人  
序鄭人下杜氏曰齊在鄭下非卿也襄二十七會宋陳  
孔奐序蔡公孫歸生衛石惡下昭元會虢陳公子招序

衛齊惡下蔡公孫歸生上襄昭以後陳從楚則陳侯序  
蔡侯下其後蔡從中國則蔡侯復序衛侯上其大夫自  
如其班周禮大司馬設儀辨位以等邦國春秋之初魯  
以周班後鄭而鄭怒有郎之師小國諸侯亦降爵來朝  
不待伯者出而班序已亂矣凡主會者所序公羊傳曰  
其序則主會者為之主會謂伯者伯主序諸侯上齊桓  
劄伯自單伯會諸侯于鄆以後齊侯恒序宋公上唯遇  
梁丘序爵蓋簡禮相見書如其班與主會不同晉自文

公以後終春秋序齊侯宋公上也紀鄭之戰齊侯序宋公上蓋別有故而外傳則曰齊僖于是乎小伯其先宋蓋以疆大爾予謂小伯之說出外傳非春秋語陳侯序衛侯上蔡侯序衛侯上春秋皆以陳蔡衛為序桓十六年伐鄭衛侯陳侯序蔡侯上杜氏以為蔡後至此時衛疆齊宋皆以為黨故也然自有說杜說非也陳常先衛一定之序然至莊十五年齊桓會鄭陳侯先衛杜氏以為陳介于齊楚之間為三恪故桓公進之非也陳常先

蔡亦一定之序也然至襄二十六年二十七年陳侯始序蔡侯下蓋楚人以蔡近且服楚無二心故先蔡蔡之先衛亦一定之序然至定四年會召陵侵楚蔡侯始復從中國故序衛侯上也陳之在蔡衛後者蔡衛侯而陳子也于是一反周禮之舊矣子男序侯伯上男序子上莊十六年同盟于幽許男序滑伯上僖四年伐楚以後許恒序曹伯上十六年會淮許序邢侯上成五年同盟蟲牢邾子序杞伯上六年同盟馬陵莒子邾子序杞伯

上以後莒邾恒在杞上也世子序小國之君上晉悼之  
會齊世子光恒序薛伯杞伯小邾子上襄十年序滕子  
薛伯上十一年序莒子邾子上傳以為先至非也齊大  
國也每貳于晉故悼公違禮進其世子以說齊也在喪  
稱子居本班或降其班僖九葵丘宋襄稱子在本班二  
十八會溫陳共稱子班鄭下定四會召陵陳懷稱子班  
鄭上杜氏曰無義例蓋主會者所為也衛侯之弟攝位  
受盟稱子序鄭伯下僖二十八踐土衛叔武是也晉卿

序齊宋上僖二十九盟翟泉晉人序宋人齊人上以後  
晉卿恒序齊宋卿上也齊卿序宋卿上襄二會戚齊崔  
杼序宋華元上以後齊卿恒序宋卿上也唯師以國序  
莊十齊師宋師僖元齊師宋師二十八晉侯齊師宋師  
秦師襄二晉師宋師衛甯殖是也亦有不序國而序主  
兵者隱五邾人鄭人伐宋是也秦卿序宋卿上成二盟  
蜀秦右大夫說序宋華元上僖二十九會盟翟泉秦人  
序陳蔡下者晉文以周班次之秦伯爵其臣不得先侯

國之卿也蜀盟超宋卿上者楚嬰齊主會崇其與國以形勢軋諸侯也楚既可先宋則秦亦可先宋矣此天下之勢也凡盟會以國地者國主不序桓十四會曹僖十九盟齊二十盟邢皆國主與盟會唯隱五盟宿杜氏云宿亦與盟按宿無與于魯宋之故何為列之盟會故說者不取僖二十七年公會諸侯盟于宋宋方見圍雖地以宋不嫌與盟凡微者雖有諸侯之事不序穀梁傳離至不可得而序也予讀春秋而悲蔡之先陳秦之先宋

者楚起蠻荆而亂封國之常也許序滑伯上邾子序杞伯上者中國自為亂五等之常也天下勢而已矣悲夫

日月

杜氏曰記事者以事繫日以日繫月以月繫時以時繫年此常法也豈惟大事即散民野服韻客騷人亦或有記風雨詳陰霽以即事感興焉是歲月日時春秋固無不欲書也第有一時失記而不書者有他國不告而不書者有年遠佚簡而不書者聖人亦無如之何耳即所



書月日亦豈無法哉第以書不書為褒貶較量一時一日以寄我委曲之心賞罰之典則聖人亦勞且拙矣蘇子絲曰崩薨卒弑葬如廟之祭盟戰敗入滅獲日食星變山崩地震火災凡如此者皆以日成者也朝覲蒐狩城築作毀凡如此者皆以時成者也會遇平如來至侵伐取救次戍追襲奔叛執水旱雨電冰雹雷彗孛蝨螟凡如此者或以月成或以時成者也此物理一定聖人所不得而措意也趙子常曰凡上有繫日之事而下有

不日之事嫌于同日則書是月以明月例如僖十六年春嫌于不日則再書其日以明日例如桓十二年十一月丙戌公會鄭伯盟丙戌衛侯卒之類苟二役為一事則蒙上事日如僖二十八年盟于踐土與朝王所同日之類凡一月有二事俱合日而前事赴在後者則以往日附來日如僖九年九月戊辰諸侯盟甲子晉侯卒之類蓋甲子在戊辰前四日杜氏曰書在盟後從赴也赴在後月者則以其日繫後月如成九年七月丙子齊侯

卒之類杜氏曰丙子六月一日書七月從赴也凡同月  
事有兩事皆合月者則以下事蒙上事之月事不合月  
而下有合月之事則為下事月苟二役為一事則不為  
下事月如僖二十八年冬會于温天王狩于河陽壬申  
公朝于王所之類蓋壬申十月十日也有日無月見非  
會諸侯則無朝故蒙上不月事所謂著例也此文理一  
定聖人所得而轉筆也至于他文則非予所敢知矣  
夫事有大善大惡則必慶幸之痛恨之為之備書其所

繇起以為勸戒之端書時書朔晦書支干人情固自如  
此故日為詳則不日為畧不月為彌畧是也然有勢不  
能詳者聖人雖欲詳之而不可得也日為重則不日為  
輕不月為彌輕是也然有勢不得重者聖人雖欲重之  
而不可得也按經傳書日凡六百八十一事自文公以  
下書日者二百四十九宣公以下書日者四百三十二  
此則久遠佚簡不與近同之一驗矣孔氏曰春秋諸事  
皆不以日月為例其以日月為義者惟卿卒日食二事

而已桓十七年十月朔日有食之傳曰不書日官失之也而公羊氏又有食在朔食在晦之說此猶易明者也若卿卒書例傳于隱元年十二月公子益師卒發之曰公不與小歛故不書日然公孫敖卒于外而公在內叔孫婁卒于內而公在外則非不與也穀梁以為惡故不書日然公子牙季孫意如惡矣而書日則非惡也獨公羊以為遠者蓋言傳聞之遠實為得之趙子常于春秋已思過半獨拘泥日月太甚至于諸侯之葬以書日為

奢不日為儉支離垂舛殆不可言究如秦惠公之卒書日而不得其說則歸之無所考而已豈不悖哉

五伯一

蘇頌濱曰或曰五伯并稱何昉乎曰昉乎戰國之世戰國之士所以鼓譟其君則伯而已矣曰桓與文恐其高而畫也故下及秦宋楚曰秦亦可伯也宋亦可伯也楚亦可伯也盛鼓于時遂弗改于後耳或曰謂秦為伯者孟子之言也左氏之言也謂宋為伯者公羊之言也謂

楚為伯者又左氏之言也三子之言非與曰孟子激辭也左氏誣辭也公羊偏辭也孟子嘗稱百里奚曰秦繆公用之而伯矣又曰相秦而顯其君子天下矣又曰仲尼之徒無道桓文之事者又曰管仲曾西之所不為也而子為我願之乎且桓文之事不道矣秦繆反可道乎管仲不足為矣百里奚反可為乎嘗究其說矣時則有以伯軋已者故敗管仲以拒之時有以游說軋已者故又申百里奚以抑之亦不思秦于百里奚曷嘗盡用其

言乎秦曷嘗伯乎君曷嘗顯乎故曰孟子激辭也左氏  
于百里奚如遺而譽孟明如不及既執而歸則曰不以  
一眚掩大德又曰孟明念德矣焚舟則曰遂霸西戎用  
孟明也夫孟明不智無勇違父悞君百里奚不幸而生  
不肖之子秦穆公不幸而畜此不令之臣千里而襲人  
強賊之行也臨戎而見執後世之耻也焚舟之後晉特  
不出秦無少加于晉也封尸而歸何救于塗地之敗也  
曰德何德曰念何念西戎素服于秦豈繇封尸而伯左



氏之筆于是為曲矣舍其父而稱其子掩其是而飾其非後人又溺其說而信其事豈可哉故曰左氏誣辭也公羊之言曰不鼓不成列不禽二毛雖丈王之師不過是君子不暇責其重許襄公而恨其輕待文王也今夫卵也而與流丸齊注不自虞毀卵而籍石以綿織兒知笑之矣然則公羊不出戶之臞儒也其習鄙其言戇故曰公羊偏辭也于邲之戰左氏假借楚子滔滔千言沛若有餘楚子夷且陋又臨戎當陣而引三詩援七德若

橫經之儒其誣可知予無責耳矣或曰是則然矣子以秦伯之謚為繆何哉曰子不觀謚法乎名與實爽曰繆布德執義曰穆之二者判然殊也古之得此謚者秦魯以之學者疑秦伯霸王魯公尊賢而皆同此謚更繆為穆不思其終違蹇叔徒尊子思是爽實之大者也繆不亦宜乎或曰然有證乎曰有墨家之徒纏子佑鬼神而引秦繆公上帝賜之年九十事儒者董無心難以秦繆書文且曰繆者誤亂之文謚者德惠之表有誤亂之行

者天賜之年有德惠之表者天奪其命乎史記蒙恬傳  
曰昔者秦殺三良而死罪百里奚而非其罪也故立號  
曰繆古之可證者若此予言豈無稽哉

五伯二

鄧元錫氏曰或曰桓文之未出也其權散桓文之既出  
也其權聚較利害則權散而交鬪不若權之聚可紓禍  
而息民語王道則權之聚而疑主不若其散而未有屬  
也是惡聚而喜散也惡聚而喜散有激者之心也非王

心也夫齊桓之功莫大于存三亡國矣而衛杞其尤也  
乃春秋書城楚丘城緣陵畧美績而不序何也進之王  
也進之王者公之天下也天下之危與天下安之天下之  
亡與天下存之我無功焉故不著之齊人無德焉故不  
著之衛著之杞也故救邢大其師城衛大其績木瓜著  
其感功之矣而終進之于王一泯其怨德之報聖人之  
善救人也乃晉文之功莫大于城濮矣然伐衛以致楚  
分曹衛田以怒楚賂齊秦以軼楚雖其克捷而召陵以

義勝城濮終以智計勝也故子玉請戰晉師避舍若不  
汲汲然者經探其志而書及踐土載盟晉敵王所愾而  
陳俘王享醴命侑賜弓矢拒鬯命之伯也而經畧不書  
以為是譎而不正也春秋之義大居正也踐土尊王之  
功不後于首止而義不得比于首止以為是文具而寡  
忠也會河陽稱狩全天王也執衛侯稱歸京師尊京師  
也春秋之義致用忠也翟泉之會比美于召陵而義不  
得比于召陵以為王霸之道自此失也於王圻而盟致

王人而盟乃其所與盟者晉列國之大夫也而大夫專盟之漸萌始矣故五霸桓公為盛晉文下之宋襄霸之反也秦穆霸之修也楚莊霸之變也其每下者也曰霸之反柰何彼其人憤烈似義復言似信小不忍似仁而施之不當為悖也周書有之曰大邦畏其力小邦懷其德小邦懷德懷于仁也大邦畏力屈于義也滕之為滕弱小矣不與于中國之會盟終齊桓之世不加兵亦怨其不及也已爾而首執之鄆受盟而用之何虐也曹宋

之怨舊矣始受盟而復圍之斯遵何義也乃會楚則乘車以示信戰泓則不鼓不成列不獲二毛以示仁威加于小國莫之懷也德狃于大國莫之畏也是宋襄之仁義也其設之不當也仁義之不繇衷也仁不繇衷故愛不著于惻隱義不繇衷故威不斷于羞惡而徒以煦煦子子為也霸而見執經以自執為文故曰霸之反也秦穆霸之脩也誓殿乎典誥詩列之國風重之矣乃畧不見經何也曰春秋為中國王統而脩也秦穆無志乎中

國者也置惠建文立晉君矣城濮之戰與攘楚矣而踐  
土河陽之會無列則無志焉故也無志乎合中國而專  
闢土以為功盡歧雍之地而闢之極西戎以為利是翟  
秦之所以并天下也故聖人没其事于春秋而列其言  
於書詩曰湯湯乎風肅肅乎誓茲胡為乎來哉没其事  
者薄其迹列其言者著其微故春秋知微也乃楚莊經  
見何也楚莊有志乎中國者也莊有志乎諸侯而中國  
之霸統適中絕而莫振故謹志于春秋及巴秦滅庸書



曰是索中國之西南而疆之也非志庸巴已也滅舒蓼  
又書曰是索中國之東南而疆之也非志滑汭已也于  
是乎有陳鄭宋之師然滅陳而能復比于仁其滅也未  
滅而書入入鄭而退舍比于禮其入也未滅而書圍辰  
陵之盟陳鄭合矣歸父如宋齊魯往矣啣之戰晉失伯  
經書晉及傷中國失道屑屑于爭鄭而不知其本也其  
自言曰夷狄之有君不如諸夏之亡蓋歎之也至宋人  
及楚人平不盟不誓釋然而去之曰非君國之故而平

也從宋人所同欲而平也非宋人所欲而平亦楚人所同欲而平也故經不書楚子不舉楚師一公之于人蓋君子大其平乎已也充斯義也蕩蕩乎欲惡與人同而已不與焉于是知春秋之與善弘憂生民者大而尊王以天也故治春秋者治五霸而已矣治五霸治之以天道而已矣

楚夷

郝仲輿曰說者曰春秋夷楚不與其為國故州之夫禹

貢九州而朝者萬國周一州為二百一十國州非小于國也楚居荆荆以卑之吳亦夷居揚而何不揚之祇可笑矣襄鄧汝漢近在侯綏商頌曰維女荆楚居國南鄉言至近也揚越之地會稽之山具笠之澤皆職方內九貢入焉正朔加焉巡狩至焉朝會同焉帝王盛時以封賢哲為藩輔仲尼一切割為夷狄僅僅守一規之中原曰此王民王土也不亦觸蠻之天下也與哉而禹湯文武不亦棘端之王也與哉其說始于漢司馬遷謂楚故

蠻夷吳自壽夢始通中國夫壽夢時春秋之末造矣九州闢自唐虞歷夏商周千有餘歲豈春秋定哀前荆揚尚為異域乎齊桓伐楚問王祭不共未嘗詆其為夷管仲遣蒙孫通好宋襄求霸乞盟于楚世儒何據創為此例古稱荆蠻猶魯淮夷齊萊戎周之陸渾晉之赤白狄不以累周晉齊魯柰何以羣蠻故併累吳楚也孔子豈惟不損楚生平所欲有為者正惟楚按魯定公十二年孔子罷司寇去魯至哀公十一年返魯在外十有四年

而居陳蔡者強半陳蔡小國耳晉楚吳交爭之其君臣  
流離朝不及夕孔子奚取焉蓋二國楚屬往來頻數意  
常在楚也是時齊將絕晉將分諸姬惟衛而國小政亂  
不可有為諸侯地廣民衆無如楚故檀弓記有子之言  
曰夫子失魯司寇將之荆先之以子夏申之以冉有其  
故可知也及楚昭王使人聘孔子陳蔡大夫沮之子貢  
適楚昭王以兵來迎欲封孔子書社地七百里子西不  
可而昭王遂卒向使昭王不死孔子其能舍楚乎今按

論語記孔子遇狂接輿遇沮溺丈人皆繇楚往來陳楚間耳聖人之志千載如見世儒謂為攬楚真無稽之言或曰楚不敢兼中原非晉之力與曰然顧晉亦不敢兼諸侯非楚之力與晉自重耳納王請隧包藏不軌召天子朝諸侯睥睨神器所不得滿志惟楚人控其膺耳故有晉不可無楚無楚亦必有晉存則兩存絀則并絀彼執夷夏之例為安攘之說鄙儒之見而不識天下之機者也然則仲尼稱管仲曰吾其被髮左衽所謂被髮

左衽者非楚與曰非也聖人之寓言也春秋諸國無被髮左衽者雖陸渾赤白狄居中國久亦無被髮左衽者昔戎狄伐周伐晉侵曹侵杞滅衛齊桓公伐山戎管仲平戎于周隰朋平戎于晉城緣陵遷杞城楚丘遷衛城夷儀遷邢所謂免于被髮左衽以此烏在其謂楚乎昔者西周之亡也以戎而東周之有戎也以晉晉人遷陸渾于洛以逼東周楚子伐之春秋書之予楚功也豈其伐戎者反斥為夷而參戎者反為攘夷乎先王之制蠻

夷要服去王畿二千里戎狄荒服去王畿二千五百里  
楚上世為丈王師受封先齊魯都郢即今歸州去中原  
纔千里而南蠻遠在炎徼北向之外楚宅南方侯服之  
中惟是洞庭彭蠡稱三苗唐虞已分北是地為華壤久  
矣豈仲尼作春秋尚追數四凶乎江漢汝墳二南首善  
斥為蠻荒則五服缺一面而中原無南土矣豈春秋之  
義然則春秋無惡于楚乎曰有之惡其僭稱王惡其蠶  
食諸侯吞併小國惡其興兵構怨與齊晉汨亂天下凡



春秋所惡于楚者晉皆有楚所得罪于春秋晉不無然則天下何賴于晉何獨責于楚晉欲致楚不能而說者解嘲曰夷狄不可同盟會夫盟會非聖人之禮不同盟會非聖人之禁世儒艷霸功而臆為例何可與論春秋也吳越當楚東南去中原稍遠然而冠裳文字與中國同唐虞以來東南為文明之區久矣是故禹朝諸侯于會稽舜南巡狩至于蒼梧之野禹貢五服東西南北各五千里舜葬蒼梧禹葬會稽皆在五服之內殷周盛時

無減虞夏惟幽厲中衰或數十年不朝天子耳司馬遷  
作吳世家謂吳自闔閭始通中國猶醒者晏起而問夜  
未央醉夢之言耳

獲麟

席書氏曰世儒于獲麟之疑迄無合一之論或曰感麟  
而作因以為終或曰制作三年文成麟至茲二說者吾  
從誰歟嘗與博文好古之士尚稽遺經之疑時遭一人  
焉專于格麟之說甚固時遭一人焉專于感麟之說且

聖讐論頻年莫能下也。比歲都水淮陰有艤舟清浦問  
予者曰：格麟之說信然歟？予曰：未也。此過于尊聖者為  
之也。為斯說者其必曰：夫子之文成于哀公十三年冬  
至十四年春，麟遂出也。斯言也可以語中人，不可以語  
上智。其諸好事者崇獎聖經之過，故為侈大之言，謂聖  
人神化建天地而不恃質鬼神而無疑也。不知所謂聖  
人者，正唯無險怪以高人也。夫謂春秋成而祥麟至，言  
已竒事已怪矣。文以冬成麟以春至，時之的會事之後

先曾無一爽竒怪亦又甚矣謂文成于十一月冬是夫子于所際之月書所親見事安知非後時而書乎就以所見而書安知夫子之文果必終于此乎絕筆于獲麟猶曰以麟故也絕筆于十一月冬將謂何歟騶虞麟趾周召之得邦家者之徵應也夫子不得邦家而後有春秋之作豈有窮者制作能致達者徵應歟聖人能使天道必應于己顧不能使天任己作東周之盛易天下之人他經萬世之功不在春秋之下麟之出設果有為將

為聖人出不專為春秋出也况實無為乎此格麟之說  
吾無取乎爾也或曰格麟之說既聞命矣敢問感麟之  
說何歟曰似亦未也夫子作春秋蓋其生平之志非以  
一朝一夕故也幸而麟出春秋因而作也使終其身麟  
不出春秋其終不作乎幸而麟出是年春秋因而終也  
使當其年不出春秋當何止極乎或謂春秋固終作特  
緣是有發也此亦不得其說而牽會之也按魯哀公十  
一年孔子知道不行而自衛反魯十三年正其刪述

六經時按夫子没于哀十六年夏麟出于十四年春使麟出於哀公初年夫子初有感而不暇作也使麟出于十五六年夫子雖有感而無從作也春秋之作或于獲麟之年或于麟先或于麟後皆不能必知也若夫子有意而止于獲麟其有感于麟必矣其或無意而偶止于獲麟是年之後或以疾而不能續歟或以没而不及續歟或如朱子註大學至誠意章而卒歟此感麟之說亦未喻于人心也或曰二說不同是非必居一矣吾子皆不

之從何也曰無據曰子有據乎曰孟子孟子曰春秋成而亂臣賊子懼聖人以亂賊之懼為功不以麟出為功也曰詩亡然後春秋作春秋之作以詩亡也非以麟也曰孔子懼作春秋春秋之作以懼亂也非以麟也予嘗言曰春秋之作不以麟麟之出不以春秋非予言也孟子先言之矣

大義

春秋所書諸侯爵叙之法隨其自通初無進退能用侯

伯禮則侯之伯之能行子禮則子之或人或子或伯或國因時俯仰不可要典故劉知幾謂春秋就敗以明罰因興以立功胡康侯亦曰春秋傾否之書而或者以崇勢利獎奸雄即聖人亦不得已焉嗚呼夫孰知夫子一字特書以盡貶二百四十年之為君一字不及以盡貶二百四十年之為臣為儒者所習而不察乎蓋自周室下衰強侯擅命一切生殺予奪不復稟承為諸侯者無士服入見之禮為卿者無命于王朝之法夫士也不請



命而為諸侯為卿有是理乎有王者起寧待教而誅之乎故夫子一字特書以盡降二百四十年之諸侯一字不及以盡降二百四十年之卿無一得免者知者見之凜然可畏讀者習之隱然不露然後知聖人雨露雷霆化工之妙真非游夏所可及也一字云何禮曰天子曰崩諸侯曰薨大夫曰卒此定制也春秋書魯君曰薨大夫皆曰卒卿卒從大夫此定法也列國諸侯之沒也既從臣子辭公之矣何以不書薨而書卒乎惟大夫

稱卒今列國諸侯而稱卒是降其不得為諸侯也胡氏曰周室東遷諸侯放恣專享其國而上不請命聖人奉天討以正王法則有貶黜之刑矣因其告喪特書曰卒不與其為諸侯也康侯議論縱橫此最有得哉一字不及者云何曰大國三卿二卿命于天子一卿自命如僖二年管仲辭饗而曰臣賤有司也有天子之二守國高在宣十六年晉侯請于王以黻冕命士會將中軍且為太傅詳其語意士會為新請也以士會有滅狄功乃黻

舊京本色以寵之耳若僖二十七日之晉命趙衰為卿成  
十七之晉悼使魏相士魴魏頡趙武為卿昭十二之魯  
叔孫昭子之以再命為卿襄十九之鄭立子產為卿無  
慮皆自命矣故春秋于諸國一切為卿者不書即有一  
二請命于天子如士會者亦不書以為諸國皆無卿凡  
卿皆大夫也諸侯惟得自命大夫吾與其為大夫而已  
矣請再明徵之僖三十三年以一命命卻缺為卿而成  
三年之晉殺卻缺止書大夫不書卿也成三年晉作六

軍趙括韓穿為卿而成八年晉侯使來言汶陽之田止  
言韓穿趙括之殺止言大夫皆不書卿也文元年公孫  
敖以卿出聘而止書公孫敖不書卿也宣十四年孔達  
盟于清丘傳謂卿不書而止書衛殺其大夫孔達不書  
卿也成二年衛孫良夫帥師石成子曰子國卿也而經  
亦不書卿也數例合符經傳甚確夫王有公諸侯有卿  
班之等爵布在腹心胡可有缺而春秋一書絕無一卿  
以名見者是降二百四十年之卿不得為卿也此夫子

傳心之要典正得詩人隱諷之旨烏在其為立功而傾  
否耶昔求叔書五代之君皆曰崩佐逆皆曰薨或者以  
為盜賊篡逆之徒生前既已為帝為王崇高富貴止藉  
君子筆削之嚴以稍誅其惡而復崩薨之則此輩既得  
竊命于生前又得徽榮于死後是為惡者無時而不利  
也然乎聞求叔後亦悔之而事已無及不能追改矣豈  
惟命爵即討罪亦然春秋如有義戰固當書征然而不  
書也陳氏曰春秋上下二百年間未嘗一書征者以諸

侯之侵伐皆非奉王命以敵所愾相為強弱以構禍亂  
非上之所以伐下固有敵于我師者也然則陳人蔡人  
從王伐鄭亦上之伐下不謂之征何也曰征之為言正  
也伐鄭之事出于交惡而已豈所謂正乎吁即此三事  
而春秋大義凜然矣

春秋辯義卷首七